

ՄԻՋԵԿԵՂԵՑԱԿԱՆ



«ՔԱՂԱՔԱԿՐԹՈՒԹՅՈՒՆՆԵՐԻ ԵՐԿԽՈՍՈՒԹՅՈՒՆ» ՀԱՄԱՇԽԱՐՀԱՅԻՆ ՀԱՆՐԱՅԻՆ ՖՈՐՈՒՄ ՀՈՌՈՍՈՒՄ

Հոկտեմբերի 10-ից 13-ը Հունաստանում, Հռոդոս կղզում, անցկացվում է «Քաղաքակրթությունների երկխոսություն» Համաշխարհային հանրային հինգերորդ ֆորումը, որին մասնակցում են ավելի քան յոթ հարյուր պատվիրակներ:

Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի օրհնությամբ ֆորումի աշխատանքներին Հայաստանյայց Առաքելական Սուրբ Եկեղեցին ներկայացնում էին Մայր Աթոռ Սուրբ Էջմիածնի Միջեկեղեցական հարաբերությունների պատասխանատու Գերաշնորհ Տ. Եզնիկ արքեպիսկոպոս Պետրոսյանը և Մայր Աթոռի Տեղեկատվական համակարգի տնօրեն Արժանապատիվ Տ. Վահրամ քահանա Մելիքյանը: Ժողովին ներկա էին նաև Գերաշնորհ Տ. Սեպուհ արքեպիսկոպոս Սարգսյանը (Մեծի Տանն Կիլիկիո Կաթողիկոսություն) և Հոգեշնորհ Տ. Գուսան վարդապետ Ալեանյանը (Երուսաղեմի հայոց Պատրիարքություն):

Եռօրյա ժողովի ընթացքում քննարկվեցին հետևյալ հարցերը. «Քաղաքակրթության միջավայրի ձևավորում. ավանդույթներ և նորարարություններ», «Կրթությունը զարգացման ռազմավարության փնտրտուքի ճանապարհին», «Աշխարհի տնտեսական համակարգի ռեգիոնալացում ու փոխակերպում», «Կրոնը և քաղաքակրթությունների երկխոսությունը», «Միջմշակութային երկխոսության քաղաքակրթական միջավայրը», «Քաղաքակրթությունների երկխոսությունը և օրենքը», «Քաղաքակրթությունների երկխոսություն. մտահղացումից դեպի իրականություն», «Միջին Արևելքը միջքաղաքակրթական հարաբերություններում», «Չինական քաղաքակրթությունը համաշխարհային երկխոսության համատեքստում», «Երաժշտությունն իբրև երկխոսության համընդհանուր լեզու», ինչպես նաև քննարկումներ տեղի ունեցան մարդկությանը սպառնացող վտանգների, զանգվածային լրատվամիջոցների երկխոսության, գիտական նվաճումների և համաշխարհայնացման գործընթացների մասին:

Համաշխարհային հանրային ֆորումը ստեղծվել է 2002 թվականին, երբ Ռուսաստանի, Հնդկաստանի և Հունաստանի տարբեր հասարակական կազմակերպությունների ներկայացուցիչները հիմնեցին «Քաղաքակրթությունների երկխոսություն»

սություն» միջազգային ծրագիրը: Ֆորումի հիմնադիրներն ու համանախագահներն են Վլադիմիր Յակունինը (Ռուսաստան), Չանդրա Կապուրը (Հնդկաստան) և Նիկոլաս Պապանիկոլաուն (Հունաստան): Անցնող հինգ տարիների ընթացքում նման կոնֆերանսներ են գումարվել Մոսկվայում, Սանկտ Պետերբուրգում, Վիլնյուսում, Աբխազիայում, Թուրքիայում, Հունաստանում, Իսրայելում, Իտալիայում, Իսպանիայում և Կիպրոսում:

Ֆորումի հիմնական նպատակն է համաշխարհային հանրության ջանքերի մեկտեղումը հանուն մարդկության հոգևոր և մշակութային արժեքների պաշտպանության, ժամանակակից աշխարհի քաղաքակրթությունների միջև կառուցողական երկխոսության միջավայրի ստեղծման, խաղաղության և միջազգային անվտանգության հաստատման: Համաշխարհային ֆորումը միտված է արդյունավետ և ժողովրդավարական միջոցներ մշակելու համընդհանուր խնդիրների հաղթահարման համար:

*ՄԱՅԸ ԱԹՈՌ ՍՈՒՐԲ ԷԶՄԻԱԾԻՆ
ՏԵՂԵԿԱՏՎԱԿԱՆ ՀԱՄԱԿԱՐԳ*